

'O vico 'e scassacocchie

di Ferdinando Russo



I.
Dint' 'o vico 'e Scassacocchie,
don Pascale 'o cusetore
tene 'e ccorne p' 'e mal'uocchie.

E, ndennimmoce a duvere,
don Pascale è n'ommo 'e core,
e te sape fà o mestiere!

Comme cose! È nu spaviento!
Comme taglia! È na bellezza!
Taglia dinto a nu mumento!

'A mugliera ca 'o vo' bene
propet'essa nce l'ha mise
chelli ccorne. Isso s' 'e ttene!

E se sape! Tanta gente
te vo' male a cchisto munno!
Nun te fanno arrigna niente!

Ammacaro, cu sti ccorne
appennute sott' 'a porta,
schiatta 'a mmiria e schiatta 'a morta!



II

'I che ssà! Quann' 'a fatica
fa campà nu lavurante,
l'hanno 'nganna tuttuquante!

Chella 'a moglia 'e don Pascale,
chella llà, mo nce vo' 'o fatto,
è na ronna ca va assaie!

'O cunziglia, 'o fa fa' chiatto,
l'ha luvato. 'a dint' 'e guaie,
si vo' tre, lle porta quatto,

l'accarezza, s' 'o cuverna,
tira accunte 'o macazzino,
lle vo' sta' sempe vicino...

Nzomma, chella è nu tesoro!
Don Pascale c' 'o ccapisce
va dicenno ch'essa è d'oro.



III

Schiatta a mmiria! Se fatica!
Chi fa ll'arte 'e Micalasse
che se magna, turze 'e spica?

Accussi se faticasse
ogge e sempe! 'A ggente parla?
Che nce mporta a nuie? Schiattasse!

Tutte ll'uocchie ncuollo a lloro,
e pecché? Pecché Pascale
nun le manca mai lavoro!

Cca nisciune, già se ndenne,
po' fa' sempe 'e fatte suoie!
Neh, sta ggente che pretenne?

Don Pascale magna 'e ddoie?
Ma magnammo, eccoce cca!
E nun tutte 'o pponno fa'!

E 'a megli'ora! Po' se n'esce,
pecché 'a vista (chillo cöse)
faticanno nce patesce!

Vene 'o ggiovane? Ma chillo
apparecchia e fa pertose,
chillo povero Ciccillo!



'A mugliera 'e don Pascale
'o putregge e 'o vede bbene?
E gnorsì Che nc'è de male?

Chillo tene n'arta 'e mmane!
Po' se mena 'e capa sotto
e gguaragna 'e ssettimane!

Vuie lle date nu cappotto?
Chillo fa cinco pertose
cuntann'uno anfino a otto!

E stat'isso, propet'isso,
che ll'ha dato stu cunziglio!
Chillo llà è nu buono figlio!

Sa' ch'ha ditto? «'Onna Carmè,
appennimmo na pareglia
e faciteme fa' a mme!

Ammacaro, cu sti ccorne
appennute mmocc' 'a porta,
schiatta 'a mmiria e schiatta 'a morta!»

